

Augsburg, 10. November 1576

An Henri Estienne

Staats- und Universitätsbibliothek Bremen, Ms. a. 8, Nr. 416 (msa 0008/416) (nicht eigenhändig bis auf die Unterschrift).

S. Nae tu parùm recordaris Alfeni faeneratoris, qui etiam bona nomina, non appellando mala fieri dicebat. Annus iam integer exijt, ex quo Thesaurum Latinae linguae, à me petitum, accepi. Misit Herbardus etiam Graecum tuum Thesaurum, et veteres Graecos oratores. Quos etsi non desideraram: vltrò tamen oblatos repudiare nolui. Etsi autem interea ter aut quater nisi fallor à te petij, vt quid tibi pro his literis deberem, et cui solui velles significares: tamen nihil adhuc responsi abs te tuli, siue literulae meae interciderint, siue inter amplissima negocia tua in obliuionem venerint, aut alioqui de tribus capellis agi existimaueris. Ego verò, μικροψυχότερος ὥν, non minus inuitus debeo, quàm deberi mihi, in magna hominum perfidia, molestè fero: neque me, dum debeo, liberum esse iudico. Itaque gratum mihi facies, si vel Herbardo vel mihi significaris, quantum solui tibi velis.

1. Pro Thesauro Latinae linguae Lugdunensi.
2. Pro tuo Thesauro Graeco Latino.
3. Pro oratoribus Graecis abs te impressis.

Florinos nostrates habes à me decem. Quod praeterea debuero, Graeca fide statim soluam cui iusseris.

Nihil abs te his nundinis editum esse, mirati sumus non sine molestia frustrationis. Expectabamus enim praeclara quaedam, officina tua celeberrima digna. Sed fortasse temporibus impeditus, proximè nos exhilarabis. Quòd vt commodo et tuo et Reipublicae literariae fiat, Deum precor. Vale vir clarissime, mihiqúe tuo merito charissime. Augustae Vindelicorum. 10 Nouemb[ris] 1576.

Hiero[nymus] Wolfius  
Tuus.